
- 1★ وزیر دفاع راجناتھ سنگھ نے زور دتو کہ مُلک غو دفاعی شعبو خود کفیل بھارت غا نواں عزم غے نال تیزی تیں اگے بدھ ربیو ہے۔
- 2★ مرکزی وزیر خزانہ نرملا سیتھا رمن نے کہیو ہے کہ حکومت خواتین غی خود انحصاری نانہ فروغ دین واسطے گہری دلچسپی رکھے۔
- 3★ سائینس تے ٹیکنالوجی گا وزیر مملکت ڈاکٹر جتندر سنگھ نے اج کہیو ہے کہ بھارت بایو ٹیکنالوجی ور مبنی انقلاب واسطے اک دلچسپ وقت گو آغاز کر ربیو ہے۔
- 4★ تے امریکہ نے بھارت نانہ 52 عشاریہ 8 ملین ڈالر مالیت غی ہا ئی آلٹیویٹ اینٹی سب مرین وار فئیر جس نانہ سنو ہوائیز کہیں فروخت کرن غو فیصلو کیو ہے۔

Jodhpur Rajnath

جو دھ پو ر مانہ اک ہوائی شو غے دوران وزیر دفاع راجناتھ سنگھ نے دوست مُلکاں ور زور دتو کہ وے عالمی پریشانیاں غا جواب مانہ اپنی شراکت داری نانہ مضبوط کریں۔ کثیر الجہتی دفاعی فضائی مشق، ترنگ شکتی تیں خطاب کرتاں واں اُنہاں نے دفاعی ٹیکنالوجی نانہ مقامی بنان مانہ بھارت غی پیش رفت ور روشنی کہلی۔ جس تیں مُلک نانہ ہوائی جہاز، سینسر، رڈار تے الیکٹرانک وار فئیر جیسا شعباں مانہ بڑا پیمانہ ور خود انحصار بنایو ہے۔ بھارت نے نہ صرف خود انحصاری بدھائی ہے بلکہ تقریباً 90 مُلکاں نانہ دفاعی سامان برآمد کیو ہے۔ جناب سنگھ نے دفاعی شعباں مانہ باہمی تعاون تے سیکھن غی اہمیت ور زور دتو ہے۔ مہارا نامہ نگا ر نے خبر دتی ہے کہ وزیر دفاع غی موجودگی مانہ منعقد ہوائی شو مانہ بھارتی فضائیہ غا طیاراں نے اپنی صلاحیت تے طاقت غو مظاہرہ کیو ہے۔

Nirmala Sitaraman

مرکزی وزیر خزانہ نرملا سیتھا رمن نے کہیو ہے کہ سرکار خواتین غی خود انحصاری نانہ بابدو دین مانہ ڈونگی دلچسپی رکھے۔ جس سنگ ان غی باوقار زندگی گزارن گو رستو سیدو وے اور اُن نانہ کامیابی خاطر با اختیار بنایو جائے۔ یاہ گل اُن نے اج کوئمبٹور مانہ فلاحی اسکیم غا حصہ غا طو ر ور سلائی مشین بندن تیں بعد کہی۔ وزیر موصوفہ نے کہیو کہ کوئمبٹور غی 2 لکھ تیں متی کالسرین وزیر اعظم جیون جیوتی یوجنا مانہ شامل ہو ئی ہیں۔ وزیر خزانہ نے کہیو ہے مُلک مانہ 60 فیصد کالسریاں نے اپنا بینک کھاتا شروع کیا واہ ہیں۔ جن دھن یوجنا، جیون تحفظ اٹل پنشن یوجنا، مدرا تے اسٹارٹ اپس سکیم جیسی سکیمماں غی وضاحت کرتاں واں وزیر موصوفہ نے کہیو ہے مرکزی سرکار سماج غا سارا طبقات غی بھلائی بہتری واسطے پوری جان لا غے کم کر

رہی ہے۔ اُن نے سماج غی خواتین تے نوجواناں غا حوالہ سنگ قوم غی ترقی غا سلسلہ
مانہ سرکا ر غا مستقبل غا نظریہ نانہ بیان کیو۔

CS Health

چیف سیکریٹری اتل ڈلو نے قومی صحت مشن غی پیش رفت غو جائزو لین واسطے
اک میٹنگ کی۔ اُنہاں نے بنیا دی صحت دیکھ بہال نانہ بہتر بنان ور زور دتو۔ جس
مانہ مرکزی زیر انتظام علاقہ مانہ تقریباً 4 ہزار مراکز شامل ہیں۔ تے ٹیلی ہیلتھ سروسز
غا بارا مانہ بیداری پیدا کرتاں واں اُن غا معیار نانہ یقینی بنایو جائے۔ اُنہاں نے اس
گل ور زور دتو کہ مختلف اداراں مانہ ڈپلومیٹ آف نیشنل بورڈ غی نشستیاں نانہ مکمل
طو ر ور استعمال کیو جا نو چاہیے۔ تے کائے وی نشست خالی نہیں رہنی چاہیے۔ اُنہاں
نے طلباء نانہ بشکار کو رس مانہ چھوڑن تیں روکن واسطے اقدامات ور زور دتو۔

Rajiv Monson Meet

ما بی گیری مال چوکھر پالن تے دودھ خانہ غا وزیر راجیو رجن سنگھ پلک بھو نیشور
اُیشہ مانہ مال چوکھر تے ڈیری شعبہ غا سلسلہ مانہ مانسون اجلاس غی صدارت
کریں گا۔ مچھلی پالن، مال چوکھر اور دودھ غی پیداوار غی وزارت نے کہیو ہے کہ
مانسون اجلاس غو مقصد ربا ستاں تے مرکزی غے زیر انتظام علاقاں غی اُمید اں نانہ
مدِ نظر رکھتاں واں اک اجتماعی حکمت عملی تیار کرنو ہے۔ اس حکمت عملی غو
استعمال زمینی سطح ور موثر پروگرام گا نفاذ غا سلسلہ مانہ کیو جائے گو۔ جس مانہ
سکیماں غی پیش رفت با رے جائزو لین غے نال نال اس غا انجام تے بچ آلا رستہ مانہ
اصلاحات با رے تبادلہ کیو جائے گو، مانسون اجلاس مانہ محکمہ مال چوکھر تے ڈیری
غا 100 تہاڑاں گا ایکشن پلان غے تحت کئی بڑا اعلاناں غے نال بکھ بکھ سرگرمی وی
شروع کی جائیں گی۔

Ammunition Recovered

سکیورٹی فورسز نانہ کل شمالی کشمیر غا کپواڑہ ضلع مانہ پہاری مقدار مانہ ہتھیار
تے دھماکہ خیز مواد ملیو ہے۔ اک مخصوص سُو غی بنیا د ور فوج تے جموں کشمیر
پولیس نے کپواڑہ غا کیرن سیکٹر مانہ اج تلاشی کاروائی شروع کی۔ جس مانہ اُنہاں
نانہ ہتھیاراں غو اک بڑو زخیرو لبو۔ جس مانہ اے کے 47 گو لین، ہتھ گرنیڈ، آر پی جی
راؤند تے بم بنان غو سامان شامل تھو۔ سربنگر مانہ دفاعی ترجمان غے مطابق یاہ دریا
فت موجو دہ سکیورٹی صورتحال تے علاقہ مانہ آن آلاں واقعات غے پیش نظر اہم ہے۔
سلامتی دستہ خطہ نانہ محفوظ تے پُر امن رکھن مانہ لگی وی ہیں۔

Ayush Special Campaign

آیوش وزارت نے خصوصی مہم 3.0 غے تحت اک ہزار 3 سو تیں متی عوامی شکایتاں غو ازالو کیو ہے۔ وزارت نے دسیو ہے جے اس مہم غو مقصد کم غی جگہ ور صفائی ستھرائی نانہ بنانو اور برقرار رکھنو ہے۔ اس مانہ بکھ بکھ زُمران مانہ بقایا کماں نانہ وی نمیزبو گیو ہے۔ جن مانہ اراکین پا رلیمان غا 33 حوالہ، 18 پا رلیمانی یقین دھانی تے 187 لوکاں گا مسئلاں غی اپیل شامل ہیں۔ وزارت بُن خصوصی مہم 4.0 بارے تیاری کر رہی ہے۔ اس مہم غے تحت آیوش وزارت اپنا تمام عہدیداراں نانہ دتا گیا عہدہ غے ذریعے اک صاف ستھرا تے کچرا تیں پاک بھارت نانہ باہدو دے گی۔

Global Bio India

سائینس تے ٹیکنالوجی غا وزیر مملکت ڈاکٹر جتندر سنگھ نے نوی دہلی مانہ گلوبل بایو انڈیا 2024 مانہ بھارت گا بدھتا وا بایو ٹیکنالوجی سیکٹر ور روشنی کہلی۔ اُنہاں نے بھارت مانہ بایو انقلاب غی صلاحیت غو موزانو مغربی دُنیا ور آئی ٹی انقلاب غا اثرات تیں کیو۔ بھارت منڈیم مانہ منعقد ہون آلو یوہ پروگرام کا روبا ری نیٹ ورکینگ غا پلیٹ فارم غا طور ور کم کرے جس مانہ وزارت، ریاستی حکومت، سٹارٹ اپس، سرمایہ کاری تے بین القوامی تنظیمان نانہ اکھٹو کیو جائے۔ 30 تیں زیا دہ ملکاں غی 500 تیں زیا دہ نمائشاں غے نال اس غو مقصد شراکت داری نانہ فروغ دینو ہے۔ جھپڑی کہ بھارت غی بایو ٹیک ترقی تے عالمی سطح ور موقعہ فراہم کرے۔

US India Anti Submarine

امریکہ نے پانی غے اندر سُنن آلی خصوصی آلات جس نانہ سنو ہوائیز کہیں بھارت نانہ 52 عشاریہ 8 ملین ڈالر مانہ فروخت کرن غو فیصلو کیو ہے۔ یوہ آلات بھارت نانہ سمندر غے تلے بیلی کاپٹر ایم ایچ 60 آر نانہ تلاش کرن غی صلاحیت نانہ بہتر بنان مانہ مدد کرے گی۔ اس فروخت تیں امریکہ تے بھارت غے بشکار دفاعی تے حکمت عملی غا حوالہ تیں تعلقات مضبوط ویں گا۔ امریکی محکمہ دفاع نے اس فروخت غا بارا مانہ یو ایس کا نگریس نانہ آگاہ کر دتو ہے۔ لیکن اس نانہ اجیں وی منظوری غی ضرورت ہے۔ کانگریس غی نو ٹیفیکیشن غے مطابق بھارت نے اے این ایس ایس ایس قیو 530، ہائی آلٹیٹیوڈ اینٹی سبمرین وار فئیر سنو ہوائیز، اے این ایس ایس قیو 36 سنو ہوائیز خریدن ور زور دتو ہے۔ سنو ہوائیز نانہ ہوائی جہازاں تیں گرایو جائے تے پانی غے اندر غی آوازاں غو تجزیہ کرن واسطے واپس بھجیو جائے یہ آلات اینٹی سب مریں وار فئیر واسطے سستی تے موثر ہیں۔

LG Interview

جموں کشمیر غا لیفٹنٹ گو رنر منوج سنہا نے کا نگریس رکن پا رلیمنٹ راہل گاندھی غا تبصراں ور تنقید کرتاں واں کہیو ہے کہ اگر 75 فیصد تیں زیا دہ لوگ منیں کہ پچھلا 5 سالان مانہ عوام غی فلاح و بہبود واسطے کائے کم نہیں بوؤ ہے تے وہ اپنو استعفو دے دیں گا۔ چینل پنچائیت ور اک اثر ویو غے دوران جناب سنہا نے مشورو دتو کہ 2019 مانہ دفعہ 370 غی منسوخی تیں بعد عوامی جذبات نانہ جانن واسطے اک خوفیہ رائے شماری کرائی جا سکے۔ انہاں نے اس گل ور زور کہلیو کہ 18 ستمبر تیں شروع ہون آلا اسمبلی انتخابات شفاف ویں گا۔ ایل جی نے نشاندہی کی کہ جموں کشمیر مانہ حال بی مانہ لوک سبھا انتخابات مانہ 58 عشاریہ 46 فیصد ووٹینگ بو ئی ہے۔ جھپڑی گذشتہ 35 سالان مانہ سب تیں زیا دہ ہے۔ انہاں نے اس اعتما د غو اظہا ر کیو ہے کہ جموں کشمیر غی عوام بھارت غی جمہو ریت ور بھروسو کرے۔ جناب سنہا نے مزید کہیو کہ دفعہ 370 جس نے جموں کشمیر نانہ اک خصوصی درجو دتو تھو بُن آئین غو حصو نہیں ہے۔ ات تک کہ سپریم کورٹ نے وی اس تبدیلی غی حمایت کی ہے۔ انہاں نے دعوؤ کیو ہے کہ کشمیری عوام بُن پاکستان غی سازش نانہ سمجھ چکی ہے۔

SVEEP SPMR

ضلع سویپ ٹیم جموں نے ایس پی ایم آر کالج کا مرس جموں غے نال رل غے انتخابی عمل مانہ حصے داری غا سلسلہ مانہ اک ثقافتی تقریب غو انعقاد کیو۔ جس مانہ نوجوان ووٹراں نانہ آئندہ انتخابات مانہ ووٹ کہلن غی ترغیب دتی گئی۔ اس سلسلہ مانہ طالب علمان نے بکھ بکھ پروگرامان مانہ بڑا جو ش و جذبہ سنگ حصو لیو۔ جس مانہ ناچ،گانو،تے چٹکلہ وغیرہ شامل تھا۔ اس موقعہ ور ضلع جموں غا سویپ با رے ذمہ دار افسر ڈاکٹر وکاس شرما نے ٹیم ممبران غے نال نال طلباء نانہ پہلی اکتوبر 2024 نانہ اپنا ووٹ کہلن با رے آگاہ کیو تے نال بی انگی حوصلہ افزائی وی کی۔ پرنسپل پروفیسر راجندر سنگھ نے آن آلا اسمبلی انتخابات غا سلسلہ مانہ قیمتی معلومات سانجھی کرن خاطر سویپ ٹیم غو شکریو ادا کیو۔

Thakur Nomination

بی جے پی غا رکن پا رلیمان انوراگ سنگھ ٹھاکر نے اس اعتما د غو اظہا ر کیو ہے کہ بھارتیہ جنتا پا رٹی پہلی وار جموں کشمیر مانہ مکمل اکثریتی سرکا ر بناوے گی۔ یاہ گل اُن نے نگرؤٹہ مانہ بی جے پی غا اُمید وار دویندر سنگھ رانا غی حمایت غا سلسلہ مانہ کہی۔ جنہاں نے نگرؤٹہ اسمبلی حلقہ وچوں اپنا کاغذات نامزدگی داخل کرایا بیں۔ انوراگ سنگھ ٹھاکر نے بی جے پی غا قومی جنرل سیکریٹری رام ما دھوؤ تے دوجا اعلیٰ رہنماواں غے نال کاغذات نامزدگی غا عمل غے دوران دویندر سنگھ رانا سنگ شمولیت اختیار کی۔

اُن نے بی جے پی غا حق مانہہ تگڑی لہر غی نشانہبی کرتاں واں لوکاں غا جوش تے جذبہ
نانہہ اُجاگر کیو۔

Bike Rally Poonch

منظم ووٹراں غی تعلیم تے انتخابی شرکت سویپ پروگرام غا اک حصہ غا طور ور ضلع
پونچھ غا انتخابی حکام نے ووٹراں غی حصے داری غی حوصلہ افزائی غا سلسلہ مانہہ اج
اک موٹر سائیکل ریلی غو اہتمام کیو۔ مذکو رہ ریلی ڈاک بنگلہ پونچھ تیں شروع بو غے
بکھ بکھ علاقہ وچوں لنگ غے کنویاں مو کلی۔ اس ریلی نانہہ ایڈیشنل ڈپٹی کمشنر
پونچھ طاہر مصطفی ملک نے جھنڈی دس غے روانہ کیو۔ تے تقریب غی رہنمائی ضلع
چناؤ افسر وکاس کُنڈل نے کی۔ جس مانہہ چناؤ نگران تے دوجا عہدیداراں نے وی حصو
لیو۔ اس موقعہ ور خطاب کرتاں واں ضلع چناؤ افسر پونچھ وکاس کُنڈل نے ووٹر بیداری
غی اہمیت ور زور دتو۔ اُن نے کہیو کہ ہم نے اس ریلی غو انعقاد لوکاں غا ان حق رائے
دیہی یعنی ووٹ کہلن تے آن آلا انتخابات مانہہ ان غی شرکت غی اہمیت غا بارا مانہہ
متا تیں متا لوکاں نانہہ دسنو بھالنو تھو۔ اُن نے کہیو جے اس قدم سنگ جمہوری عمل
نانہہ طاقت لبے۔

Election Training

ضلع راجو ریغا تمام 5 اسمبلی حلقاں مانہہ ذیلی تے علاقائی حاکماں گو انتخابی تربیتی
اجلاس کامیابی سنگ منعقد ہوؤ۔ جس مانہہ آن آلا اسمبلی چناواں غی تیاریاں با رے
دھیان دتو گیو۔ ضلع راجو ری غا تمام 5 اسمبلی حلقاں واسطے بکھ بکھ اداراں مانہہ ماہر
تربیت کاراں غی سرشار ٹیمان نے تربیتی پروگراماں غے ذریعے سہولت فراہم کی۔ مذکو رہ
اسمبلی حلقاں مانہہ تربیتی پروگرام کالاکوٹ، سُندر بنی، نوشہراہ، راجو ری، تھنہ منڈی غا
ڈگری کالج جڈ کہ بدھل اسمبلی حلقہ واسطے ڈاک بنگلہ کو ٹرنکہ مانہہ یوہ پروگرام
منعقد کیو گیو۔ اس سلسلہ مانہہ چناؤ تربیت گا ضامن ڈاکٹر نسیم ملک غی نگرانی
مانہہ ان تربیتی پروگراماں غے ذریعے بکھ بکھ محکماں غا ملازماں نانہہ چناوی عمل با
رے ضروری معلومات تے کاروائیاں تیں واقف کرانو تھو۔
